

Poschiavo, ils 19 d'avust 2025

### **Augment moderà da las tariffas d'electricitad en il provediment da basa**

Repower furnescha vinavant a tut las clientas ed ad tut ils clients en il Grischun electricitad duraivla producida en il chantun. Ils custs pli auts per gestunar e mantegnair las raits da distribuziun e per cumprar l'energia da cumpensaziun chaschunan il 2026 in augment moderà da las tariffas d'electricitad.

Suenter il lev sbassament da l'onn passà s'augmentan las tariffas d'electricitad moderadamain il 2026. Ina chasada media cun in consum annual da 4'500 kilowatt-uras paga var 98 francs ad onn dapli; ils custs effectivs dependan dal consum individual.

La tariffa d'electricitad en il provediment da basa sa cumpona da trais elements: la tariffa d'energia, la tariffa per il diever da la rait e las taxas a la Confederaziun ed a la communitad prescrittas da la lescha. La tariffa per il diever da la rait cuvra ils custs da la rait da distribuziun e dals servetschs da sistem generals da la societad naziunala da la rait Swissgrid. Vitiers vegn la reserva d'electricitad messa a disposiziun da la Confederaziun.

#### **Custs pli auts per l'energia da cumpensaziun**

La tariffa d'energia s'augmenta l'onn proxim per stgars set pertschient pervi dals custs pli auts per l'energia da cumpensaziun. Questa energia che sto vegnir cumprada a fitg curta vista cumpensescha las fluctuaziuns tranter il consum e la producziun d'energia. Il 2026 s'augmentan ils pretschs da l'energia da cumpensaziun surtut en consequenza dal grond svilup da l'energia solara che vegn producida a moda decentrala ed è prognostitgabla mo parzialmain.

Repower furnescha vinavant a sia clientella grischuna en il provediment da basa electricitad renovabla da las atgnas ovras idraulicas e d'implants solars decentrali che alimenteschan la rait da distribuziun locala. La tariffa d'energia applitgada s'orientescha per gronda part als custs da producziun da la forza idraulica e protegia uschia la clientella da fluctuaziuns da pretschs extremas sin ils martgads d'energia.

Il svelt svilup d'implants solars decentrali e la derasaziun creschenta da l'electromobilitad augmentan era las pretensiuns envers la capacitad da la rait. Per dar dumogn a questas sfidas investescha Repower mintg'onn var 30 milliuns francs en il rinforzament da la rait, en novas staziuns da trafo ed en las pli modernas tecnologias da raits intelligentas. Quest'auta activitad d'investiziun ed in augment dals custs da gestiun mainan ad ina tariffa levamain pli auta per il

diever da la rait.

Il pretsch total per il product da standard renovabel GRISCHUNPOWER munta l'onnn proxim a 30.2 raps per kilowatt-ura consumada. Malgrà che Repower furnescha l'electricitad sur sias raits da distribuziun en ina regiun muntagnarda cun ina topografia cumplexa, restan sias tariffas er il 2026 en il rom da la media svizra. Quai è pussaivel, perquai che Repower investescha a moda effizienta e sistematica en sia infrastruttura per garantir in provediment segir a lunga vista. Per Repower han la segirezza dal provediment ed ina relaziun gista tranter il pretsch e la prestaziun prioritad absoluta en il provediment da basa da sias clientas e da ses clients en il Grischun.

## Contact

Stefan Bisculm  
manader post da medias  
t +41 81 423 78 73  
[stefan.bisculm@repower.com](mailto:stefan.bisculm@repower.com)

---

## Quai è Repower

L'interpresa Repower è dapi 120 onns activa sco producenta d'electricitad, manadra da la rait da distribuziun e commerzianta d'energia. Ses martgads-clav èn la Svizra e l'Italia. La sedia principala sa chatta a Poschiavo. Ulteriuras filialas ha ella a Bever, Grono, Glion, Küblis, Landquart, Turitg e Milaun. Repower è activa lung l'entira chadaina da valorisaziun da l'electricitad, da la producziun sur il commerzi fin a la distribuziun e la vendita, ed er en la fatschenta da gas. Repower è la pli gronda interpresa da provediment d'energia en il chantun Grischun, nua ch'ella posseda e gestiunescha pliras ovras idraulicas. En l'Italia è Repower ina da las pli grondas furnituras d'electricitad e da gas per interpresas. Il portfolio da l'interpresa en l'Italia cumpiglia plirs parcs da vent e parcs solars ed in'ovra electrica cumbinada cun gas. Mantegnair ed amplifitgar las energias regenerablas è ina part integrala da la strategia da Repower. Quai vala era per il svilup persistent da l'interpresa en ils secturs economia, societad ed ambient.